

«Tgei biala, sublima, gie sontga clamada ...»

■ (cp) La proxima sentupada «da cuminonza a Ruschein – la sera dils treis», ussa sonda ils treis da november, tematisescha il puresser. Purs e puras da Ruschein raquantan da lur menaschi e da lur muvel, da lur plaschers e lur quitaus ed era da lur scolaziun. Dus dils hosps dalla sera ein pil mument aunc egl emprendissadi e van a scola al Plantahof, dus fan gia dapi ina roscha onns il pur e san raquintar da bias experientschas professiunalas.

Gion Cadieli ha scret avon varga 65 onns en la poesia «la pura» ch'il puresser seigi ina «biala, sublima, gie sontga clamada». Forsa ha in ni l'auter gia giu da gliez temps l'impressiun ch'il plevon ori-

unds da Sagogn idealiseschi la lavur e la veta purila. Il text dalla poesia ha dil reminent inspirau *Corin Curschellas* da cumponer ina da sias canzuns las pli enconuscentas. Mo atgnamein ei ni la poesia, ni la canzun il tema dall'occurrenza. El center dalla sera stat il puresser dad ozilgi. Far il pur ei oz zatgei tut auter che pli baul. E sco dapertut ei il diember dils menaschis purils era serecius a Ruschein ils davos decennis.

Tonpli fa ei surstar che quater persunas giuvnas da Ruschein han entschiet avon dus onns ina scolaziun d'agricultura al Plantahof, denter quellas *Rilana Cadruvi* e *Fabrizio Cajochen* ch'han dau suatientscha agl invit da raquintar alla

sera «da cuminonza» da lur motivaziun, da lur practicums e dalla scola. Per Fabrizio era ei clar gia da buob da scoletta ch'el vegli d'aventar pur. Rilana encuntercomi ha fuffergnau per differents emprendissadis ed ei lu sedecidida quasi il davos mument per la scolaziun da pura.

Ursula Beeli-Caderas ch'ha surpriu avon zacons onns il menaschi puril da ses geniturs ha vaccas da latg ed ha cunzun plascher da mulscher e trer si vadials. Ina clamada senza il contact cun animals savess ella buc s'imaginar. En sia emprema professiun ha ella luvrau cun cavals (Pferdepflegerin/Bereiterin) ed in da ses siemis professiunals fuss da daven-

tar trenadra da tgauns per carstgauns cun in'impediment da vesida.

Franz Coray ha sco pur in'experientscha da varga 30 onns. Dapi biechein 20 onns ha el in menaschi da vaccas-mumma cun il brumbel da bio. El ei ugau dall'alp La Muota e tschun da sias vaccas han fatg vadi si d'alp questa stad. Per el eis ei impurtont da saver prender temps per siu muvel. Grond interess ha el era da tractar sias vaccas e ses vadials – sch'ei fa da basegns – cun mieds homeopatics.

«Purs e puras raquantan!» Sonda, ils 3 da november 2018 allas 20.15, Casa da scola Crestas, Ruschein. Dapli sin www.dacuminonza.ch



Participants a la sera da discussiun; da sen. Ursula Beeli-Caderas, Rilana Cadruvi, Fabrizio Cajochen e Franz Coray.